

Meeqqat Inuusuttullu Pillugit Ilisimasaqarfik pillugu Inatsisartut inatsisissaattut nr. x, uu. qq 2003-meersussatut siunnersuut

Kapitali 1

Siunertaq suliassallu

§ 1. Meeqqat Inuusuttullu Pillugit Ilisimasaqarfik uppersaatnik katersiffiuvoq, tassani nunatsinni meeqqat inuusuttullu atugarisaat pillugit ilisimasat pioreersut katersorneqarlutillu aqqissuunneqassallutik.

§ 2. Meeqqat Inuusuttullu Pillugit Ilisimasaqarfiup suliassaraa meeraq aallaavigalugu paasissutissanik katersuinissaq, soorlu ilaqutariinnermut, inooqataanermut, peqqissutsimut, atuartitaanermut ineqarnermullu tunngasunik.

Imm. 2. Meeqqat Inuusuttullu Pillugit Ilisimasaqarfiup taamatutaaq:

1) Paasissutissanik attuumassutilinnik aamma qarasaasiakkut katersineq isumagissavaa.

2) Misissuinerit, nalunaarusiat, ilisimatusarnermit inernerit, nalunaarusiat naliliissutaasut, kisitsisitigut paasissutissat, misiligutit inernerit il.il. pioreersut katersussallugit.

3) Ilisimasat allanit atorneqarsinnaalersinnissat, soorlu ilinniagaqartunit, ilisimatusartunit, sullissisunit, naalackersuinermit suliaqartunit allanillu soqutiginnittunit.

4) Kalaallit Nunaat tamakkerlugu attuumassutilinnik meeqqat inuusuttullu pillugit paasissutissat nutartertuarnissat.

5) Ilisimatusartunit, Ph.d.-mik ilinniagaqartunit suliassanik aalajangersimasunik naammassinnissinnaasunut attaveqarnissaq.

Imm. 3. Meeqqat Inuusuttullu Pillugit Ilisimasaqarfik ukiumi qaangiuttumi sulianik ukiumoortumik nalunaarusiortassaaq. Ukiumut nalunaarusiaq ukiumi tulliuttumi aprilip aallaqqaataa nallertinnagu tunniunneqartassaaq.

Kapitali 2

Aqutsineq

§ 3. Meeqqat Inuusuttullu Pillugit Ilisimasaqarfik siulersuisunit aqunneqarpoq.

Imm. 2. Siulersuisut 7-ini 10-inut amerlassuseqarput, Naalackersuisunit toqqarneqassallutik. Ilisimatusarfik, Nunatta Atuagaateqarfia, ilanngullugu Groenlandica kiisalu Naatsorsueqqissisaartarfik tamarmik siulersuisuni ilaasortassamik ataatsimik inassuteqassapput. Naalackersuisunut ilaasortaq

ulluunerani paaqqinniffinnut meeqqallu atuarfiannut akisussaasoq, naalakkersuisoq peqqissutsimut pitsaaliuinernullu akisussaasoq kiisalu naalakkersuisoq isumaginninnermut akisussaasoq tamarmik immikkut siulersuisuni ilaasortassamik ataatsimik inassuteqassapput. Siulernuisuni siulittaasoq Naalakkersuisunit toqqarneqassaaq inassuteqaatitaqanngitsumik. Naalakkersuisut Kalaallit Nunaanni meeqqat inuusuttullu atugaat pillugit immikkut ilisimasalinnik aamma siulersuisuni ilaasortassamik pingasut tikillugit amerlassusilinnik toqqaasinnaapput.

Imm. 3. Siulersuisut ukiunut pingasunut toqqarneqartassapput sulilu ukiunut pingasunut toqqaqqinneqarsinnaallutik.

Imm. 4. Siulersuisut suleriaasissartik nammineq aalajangersassavaat.

Imm. 5. Ilisimasaqarfimmi sulisut ataatsimeeqataasartutut siulersuisut ataatsimiinneranni peqataasassapput.

Imm. 6. Siulersuisunut allatseqarneq Ilisimasaqarfimmi sulisumit isumagineqassaaq.

§ 4. Meeqqat Inuusuttullu Pillugit Ilisimasaqarfiup sulinera piffissarlu ungasinnerusoq eqqarsaatigalugu taassuma ineriartortinnissaanut najoqqutassamik siulersuisut aalajangersaassapput. Suliassat pilersaarusiornarat siulersuisut aalajangersassavaat taamaasillutillu siunertamut naapertuuttuunissaat akisussaaffigissallugu, takuuk § 1.

Kapitali 3

Ingerlatsineq

§ 5. Meeqqat Inuusuttullu Pillugit Ilisimasaqarfimmi sulisut malittarissat atuuttut najoqqutassallu siulersuisunit aalajangersarneqartut malillugit ilisimasaqarfiup ulluinnarni ingerlanneqarnera isumagissavaat.

§ 6. Pisortaqarfik naalakkersuisunut ilaasortap isumaginninnermut tunngasunik akisussaaffeqartup ataaniittoq, siulersuisut innersuussuteqareerneratigut ilisimasaqarfimmi sulisunik atorfinitsitsillunilu soraarsitsisassaaq.

§ 7. Pisortaqarfiup naalakkersuisunut ilaasortap isumaginninnermut tunngasunik akisussaaffeqartup ataanniittup naalakkersuinikkut suliassat Meeqqat Inuusuttullu Pillugit Ilisimasaqarfimmut tunngassutillit isumagissavai.

Kapitali 4

Aningaasalersorneqarnera

§ 8. Ilisimasaqarfiup sulinera aningaasalersorneqassaaq Nunatta karsianut aningaasanut inatsisikkut ukiumoortumik akuersissuteqartarnikkut.

Imm. 2. Tamatuma saniatigut Ilisimasaqarfik sulinermi atillugu namminersortut ingerlatsiviinut imaluunniit pisortanut oqartussanut aningaasaliinissamik qinnuteqarsinnaavoq.

Imm. 3. Ilisimasaqarfik anguniakkami iluanni, takuuk § 1, isertitaqarfiusumik suliaqarsinnaavoq.

§ 9. Siulersuisuni ilaasortat Namminersornerullutik Oqartussani atorfeqanngitsut ataatsimiinnersiutinik, ullormusianik aamma angalanermut aningaasartuutitut matussutissanik tunineqartassapput, Inatsisartunut Naalakkersuisunullu ilaasortanut il.il. ataatsimiinnersiutut il.il. pillugit Inatsisartut inatsisaanni malittarisassat malillugit. Aningaasartuutit taakku aningaasanut inatsimmi Meeqqat Inuusuttullu Pillugit Ilisimasaqarfimmut aningaasaliissutit iluanni akilerneqartassapput.

Kapitali 5 *Atuutilersitsineq*

§ 10. Inatsit manna 1. januar 2004 atuutilerpoq.

Namminersornerullutik Oqartussat, ulloq uu. qq 2003.

Hans Enoksen

/

Asii Chemnitz Narup